

[145] CHAPITRE IX.

DE LA MISSION DE SAINT IEAN BAPTISTE AUX
ARENDARONONS.

LES Arendaronons font vne des quatre nations qui composent ceux qu'à proprement parler on nomme Hurons: elle est la plus Orientale de toutes, & est celle qui la premiere a découuert les François, & à qui en suite appartenoit la traite selon les loix du pays. Ils en pouuoient iouïr seuls, neantmoins ils trouuerent bon d'en faire part aux autres [146] nations, se retenant toutefois plus particulièrement la qualité de nos aliez, & se portans en cette consideration à la protection des François, lors que quelque malheur est arriué. C'est où feu monsieur de Champlain s'arresta plus long temps au voyage qu'il fit icy haut, il y a enuiron 22. ans, & où sa reputation vit encore dans l'esprit de ces peuples barbares, qui honorent mesme apres tant d'années plusieurs belles vertus qu'ils admiroient en luy, & particulièrement sa chasteté & continence enuers les femmes. Pleust a Dieu que tous les François qui les premiers font venus en ces contrées luy eussent esté femblables: nous n'en rougirions pas si souuent aupres de nos Sauuages, qui nous obiectent les impudicitez & les desbauches de plusieurs, comme si c'estoit vne marque infallible que ce dont nous les menaçons de l'enfer ne soient rien que des fables, puis que ces premiers François qu'ils ont cogneu n'en auoient point de crainte.